

Txirritola

ARAMAIO / Barikua / 2002ko irailaren 6a / 36. zenbakia

KOORDINATZAILEA: Ubane Madera • Otorala Lizentziaduna 31 20500 ARRASATE • Tel.: 943 71 25 11 • Faxa: 943 71 23 89 • Posta elektronikoa: txirritola@goiena.com

Arrasatera eta Gasteizera joateko autobus zerbitzu berria abian da

UBANE MADERA

Astelehenaz geroztik abian da Aramaiotik Arrasatera eta Gasteizera joateko beste autobus zerbitzu bat. Arabako Foru Aldundiak ipini du zerbitzua. Besteak beste, Aramaion baserrietaraino joateko aukera emango du. Horretarako, taxi zerbitzua ipini dute.

Astelehenetik barikura, 07:00etan hasi eta 21:00ak artekoa da zerbitzu berria, eta, esan bezala, Arrasate eta Gasteiz lotuko ditu, baina Aramaion barrena. Oro har, orain arteko autobus zerbitzuekin alderatuz gero, bikoiztu egin dute autobus kopurua. Horrela, goizean lau autobus irtengo dira Arrasatetik Aramaiora, eta horietatik, bi joango dira Gasteizera. Arratsaldean, berriz, bost autobus izango dira Arrasatetik, eta horietatik bi joango dira Gasteizera. Alderantziz ere, hau da, Aramaiotik Arrasatera edo Gasteizera, berdina izango da: lehen bi autobus zeuden lekuan orain lau izango dira.

Autobusa Ibarrik irteten da Aramaion, eta Arrasaten sei geraleku ditu: Gesalibarren, Gargartzan, Uribe auzoan, Eskola Politeknikoan, San Andres auzoan eta Arrasate erdialdean.

BASERRIETARAINO

Maiztasunaz gain, baina, autobus zerbitzu horrek beste berrietasun garrantzitsu bat ere badu: aramaioarrei euren baserrietaraino iristeko aukera ematen die. Horretarako, taxia izango da Ibarrik. Horrela, Arrasaten autobusa hartu Ibarrikaraino, eta han taxiak baserriraino eramango du



JULEN IRIONDO

Ibarrara autobusez igo eta gero, taxi batek baserrietara eramango ditu bidaiariak.

bidaiari aramaioarra. Zerbitzu horren ordutegia zehaztuta dago: goizean 12:15eko autobusean datorrenak erabili ahal izango du taxia baserriraino; eta arratsaldean, 20:20ko autobusekoak.

BEZPERAN DEITU BEHAR

Jakina, alderantzizko bidea egiteko (baserritik Arrasatera edo Gasteizera) aukera ere izango da. Horretarako, bidaiatzea gura den egunaren bezperan deitu behar ko zaio Aramaioko taxiari. Eta taxia bera igoko da baserrira, bidaiarien bila. Gero, Ibarrik hartu deitu bidaiariak, eta han hartu ahal izango dute autobusa. Kasu horretan ere bi autobus izango dira: goizean hamarrak

eta laurdenetan bata eta arratsaldean zazpiak laurden gutxitan bestea. Deitu beharreko telefono zenbakia 629 54 59 23 da; eta gogoratu ezinbestekoa dela bidaiaren bezperan deitzea, bestela, taxia ez da igoko.

BEHIN-BEHINEKOA

Esandako moduan, oraingo astelehenean estreinatu dute autobus zerbitzua. Arabako Foru Aldundiak Hermanos Arriaga enpresari adjudikatu dio. Aipatu dugun moduan, autobusen ordutegia ezarrita dago, baina behin-behinekua da, zerbitzuak zelan funtzionatzen duen ikusi arte. Hortaz, baliteke aldaketaren bat zein beste izatea.



Bihar, plater tiroketa Kurtzetan

Bihar, zapatua, plater tiroketa jardunaldia izango da Kurtzetan, 15:30etan. Kurtzeta-Gain elkarteak antolatuta, 50 bat lagunek parte hartzea espero dute. Azken urteotan moduan, Bizkaitik, Arabatik eta Gipuzkoatik etorriko dira. Betiere, jakina, eguraldiak lagunduz gero. Bestalde, argazkiko taldea bigarren izan da Arabako txapelketan, Okendoren atzetik eta Amurrioren aurretik.



32. aldiz, Marixeka Eguna

Eguraldia lagun izan ez bazuten ere, domekan ospatu zuten aramaioarrek eta Aramaiora etorri zirenek Marixeka Eguna. Argazkian ikusten denez, goizean goiz hasi ziren guztia prestatzen, jendea zetorrenerako hamarretako goxoa gertu izateko. Eta hortik aurrera, denetik izan zen Albiña inguru hartan: meza, bertsolariak, dantza-saioa, bazkaria... Dena, giro ezin hobean.

LABUR

Internet gertuago izan da Aramaion, Konekta Zaiten autobusari esker

Oraingo asteen, pare bat egunez, Eusko Jaurlaritzaren Konekta Zaiten izeneko programaren autobusa Aramaion izan da. Autobus horrek Internetera konektatutako 16 ordenagailu ditu, jendeak Internet erabili ahal izateko. Bereziki, erraztasun urrien dituztenei zuzendutako ekimena da, hala nola: emakumeei, 60 urtetik gorakoei, langabeei...

Zinegotzi berria izango da Udalean

Aurtengo legegintzaldian zinegotzi berria izango da Udalbatzarrean. EAJ alderdiaren barruan, Bixente Mondragon zinegotziak utzitako lekua Merxe Mondragónek beteko du.

Turistak erakartzeko ekimen berezia egin dute Gasteizen Floren Unzueta-aren eskutik

UBANE MADERA

Oporrak aprobetxatzen, aramaior bat baino gehiago Gasteizera joan da abuztuaren San Pedro eliza bisitatzen. Izan ere, han Floren Unzueta aramaiarra bisitariendako organo kontzertuak ematen ibili da. Aste Santuan berriro ere egongo da aukera.

Arabako diputazioaren eta San Pedro elizaren artean turistak erakartzeko ekimen berezia antolatuko dute aurtengo abuztuaren San Pedro elizan organo kontzertua entzuteko eta gero organoa bera erakartzeko aukera. Floren Unzueta aramaiarra ibili da jardun horretan, hura da eta San Pedro elizako organo jotzailea. Abuztuaren 19an hasi eta 31ra arte ibili da zeregin horretan, eta, kontatu digunez, izugarriko arrakasta lortu dute: "Ez genuen horrelakorik espero. Egundoko arrakasta izan du. Gure asmoa zen turistak erakartzea (katalanak eta madrildarrak etortzen dira,



NEREA ZUBIETE

Etxetik eramandako organo txiki bat erabili du Floren Unzueta organoaren nondik norakoak erakusteko.

bereziki), baina ikusi dugu hemengo jende ugari ere etorri dela: Gasteiztik, Otxandiotik,

Arrasatetik, Aramaiotik...". Organo jotzaile aramaiorrek kontatu digu ekimen horren alde

didaktikoa gustatu zaiela bereziki bisitariei, hau da, organoaren funtzionamendua ikustea. Horre-

"Nire helburua izan da erakustea organoa ez dela leku ilunetan dagoen zerbait"

tarako, etxean duen organo txiki bat erabili du eta edozeinek ulertzeko moduan erakutsi ditu organoaren nondik norakoak. "Nire helburua izan da erakustea organoa ez dela leku ilunetan dagoen zerbait. Era berean, ez du sinesmenarekin zerikusirik; sinistu edo ez sinistu, organoaren doinua bihotzean sartzen den zerbait da. Bach-ek esandako moduan, behin haren doinua entzunda ez zaitu axolagabe uzten".

Arrakasta ikusita, ekimena errepikatu egingo dutela adierazi digu Floren Unzueta; hasterako, datorren Aste Santurako dute asmoa. Gogoarekin geratu denak orduantxe izango du aukera.

BOTEPRONTOAN / Enrike Ullibarriarana · Kurtzeta-Gain taldeko kidea

"Aramaion betidanik izan da plater tiroketarekiko zaletasuna, auzo guztietan, gainera"

Gainerako kirolen artean, plater tiroketak leku handia hartzen du Aramaion. Garai baten Joko Olinpikoetan ere parte hartu izan du aramaior tiratzaile batek edo bestek (Seulen eta Bartzelonan, hain zuzen ere). Gaur egun, bada Kurtzeta-Gain izeneko talde bat. Aramaioko zaleak batzen ditu, 44 lagun. Horieta batekin izan gara berbetan, Enrike Ullibarriarana uribarriarrarekin. Kurtzeta-Gain taldearen sortzailetako bat, ehizan egitea gustuko du, baina gurago du tiroketa:

Ehiza eta plater tiroketa lotuta daaz?

Normalean denok ehizean hasten gara eta gero batzuk plater tiroketa pasatzen dira. **Antzinatek existitzen da plater tiroketa taldea?** Taldea bera, orain dela zortzi bat urte. Baina lehenagotik ere ehiza eta arrantza taldearekin batera ibiltzen ginen. Kontua da Arabako herrien arteko txapelketan parte hartu ahal izateko taldea sortzea komeni zela, eta halaxe egin genuen. Dena dela, esan beharra dago Aramaion aspalditik dagoela kirol horrekiko zaletasuna. Adibidez, ni ume nintzanean, Kurtzetan egiten zuten eta



"Beteranoak ere baditugu taldean; urrian, 78 urte beteko ditu batek, eta ondo dabil"

lehenago ere, argazkitan, ikusita ditud aita eta osabaren bat Errota Berrin plater tiroketan. Betidanik egon izan da zaletasuna, auzo guztietan, gainera.

Zergatik izango da hori?

Badakigu hemen ehiztari asko dagoela, baina halaber, geroago eta ehiza gutxiago dago, hortaz, zerbait egin behar, nik uste.

Taldean kide mordoza zarete, ezta? Geroago eta gehiago?

44. Bai, igo egin da. Hasieran, zortzi-hamar bat besterik ez ginen; baina Arabako herrien arteko txapelketan hasi ginetik geroago eta jende gehiago sartu zen taldean.

Noiz izaten da txapelketa hori?

Normalean apirilean hasten da, eta azkeneko bizpahiru urteotan 16 talde izan gara, hortaz, saiatzen gara talde bakoitzak tirada bat antolatzen. 16 tirada

izaten dira, normalean, zapatuetan. Aurten, berriz, zapatu bakoitzean bi tirada egin ditugu, horren luzea ez izateko. Horrela, ekainaren bukaeran amaitu genuen, eta, azken urteotan moduan, bigarren geratu ginen.

Horrez gain, beste zerbaitetan parte hartzen duzue?

Bai. Gure taldean hainbat maila daude (laugarrenetik lehenengora) eta mailaz igotzeko beharrezkoa da tirada ofizialak egitea. Eta, horrez gain, herriko auzo gehienetako jaietan tiradak egiten ditugu, sanjuanetan hasita, Azkoaga auzoan. Baina tirada horiek herritarrendako bakarrik izaten dira. Horrez gain, bihar, zapatua, ere probintzien arteko tirada egingo dugu gura duten guztiendako. Goiko kantxa egin genuenetik hona, urtero egiten dugu hori, irailean.

Norbaitek sartzea guraz gero...

Badaki bidea. Edozelan ere, entrenamenduak ere egiten ditugu eta bazkide guztiok dugu giltza. Etortzen diren gazteei ere saiatzen gara erakusten. **Etorkizuna...?**

Beste leku bat behar dugu praktikatzeko. Oraingoa ez da egokia, askotan eguraldi eskasa egiten du.

"Beste leku bat behar dugu praktikatzeko, askotan eguraldi eskasa egiten du-eta"

TELEFONOJAKINGARRIAK

OSASUNA / LARRIALDIAK	
Osasun etxea (txandak)	945 44 53 40
Botika	945 44 50 03
Udaletxea	945 44 50 16
Ertzaintza (Arrasate)	943 79 71 99
Gurutze Gorria (Legutio)	945 45 52 52
San Martin Eskola	945 44 50 04
Taxia eta autobusak	945 44 50 33
Udal kiroldegia	945 44 53 35
Postetxea	945 44 50 83
Zuzako Eskualdea	945 43 01 67
Suhiltzaileak (Zubillaga)	943 78 28 00

AUTOBUSORDUTEGIA

ARRASATE	ARAMAIO	GASTEIZ
07:00	07:15	08:00
12:00	12:15	13:00
15:20	15:35	16:20
20:30	20:45	
GASTEIZ	ARAMAIO	ARRASATE
08:30	09:15	09:30
13:10	13:50	14:05
	17:00	17:15
19:30	20:15	20:30

OHARRAK

BERRIRO ERE LEHENGORA

Oporren amaierarekin batera, herriko liburutegiak eta ludotekak atek ireki dituzte. Lehenengo aste honetan goizez egon dira zabalik, baina datorren astetik aurrera, eta umeak eskolan hasiko direnez, ohiko ordutegira itzuliko dira: ludoteka 16:15etik 19:15ak arte eta liburutegia 17:00etatik 19:30era arte.